

Xojon carta-la San Pablo xi kiskiì-la xita naxandá-la Cristo xi títsajna Filipos

Kó tsò Pablo nga síhixat'aà jñà xita
naxandá-la Cristo xi títsajna Filipos

1 ¹Ngats'ioò xi titsajnaà ján naxandá Filipos xi xita-la Nainá maà nga Cristo Jesús titsajnakoo, tikoà jñò xi nìkitasòn xá nga nìkindaa naxandá-la Nainá kò jñò xi nìchját'aà, 'an xi 'mì-na Pablo kò Timoteo titsanìhixot'aà-nòjen nga chi'nda-la Jesucristo 'mì-najen. ²Nainá xi Na'èn-ná, kò jè Jesucristo xi otíxoma-ná kàtatsjá-nò kjondaà kò kjoa'nchán ya jjiin inima-nò.

Kó tsò Pablo nga chjät'aà-la Nainá it'aà ts'e xita Filipos

³Jè Nainá xi 'an bexkoán, tsjaà-la kjondaà nga indiaà indiaà bitsjeèn-na it'aà tsajòn. ⁴K'e nga indiaà indiaà chjät'aà-la Nainá, 'ñó ndaà matsja-na nga ngats'ioò chjätjì-nò, ⁵koií kjoa-la nga jñò titsanìchjät'aà-ná nga ma chjàya 'én ndaà-la Nainá xi kjoa ts'e Cristo tjen-ne jè nachrjein k'e nga kòkjeiín-nò skanda nachrjein i'ndeì. ⁶'An, k'oaá s'ín makixi-na nga jè Nainá, koni s'ín tsibíts'iaako-nò nga tísíkjatjìya-la inima-nò kò kjohítsjeèn-nò, skanda k'ee s'ijngod-ne kjoa koi jè nachrjein k'e nga kjoí ijngod k'a Na'èn-ná Jesucristo. ⁷Ndaà tjín nga k'oas'ín síkítsjeèn-nò ngats'ioò jñò xi 'ñó matsjake-nò nga ngásòn kitjoé-nò kjondaà-la Nainá koni 'an; nga jñò titsanìchjät'aà-ná nga ma benojmí-la jñà xita jè 'én ndaà-la Nainá xi kjoa ts'e Cristo nas'ín ndayá tìjnaa iya, kò nas'ín xìn tìjnaa nga ósíkoaa jè 'én kò okoò-la xita nga 'én kixi-né.

⁸Tíbeè Nainá nga kixíí kjoa nga ngats'iod, 'nó matsjake-nò koni s'ín tjín jè kjoatjòcha xi 'nó tse tjín-la Jesucristo. ⁹K'e nga bitsi'batji-nò, k'oaá s'ín síjét'aà-la Nainá nga jè kjoatjòcha xi tjín-nò, isa ndaà tìtsjacha xinguiòo, isa ndaà kjohítsjeèn kàtas'e-nò kò isa ndaà kàtamachiya-nò ngats'iì kjoa xi kixi tjín, ¹⁰mé-ne koma chjaàjiin-nò kjoa xi nguì ndaà tjín. K'oaá s'ín koma-ne nga tsjeè sijchá yijo-nò kò nimé jé sakòt'aà-nò jè nachrjein k'e nga kjoíí l'jngòò k'a Cristo. ¹¹Nga kàta'ya-la nga jñò, nguì kixíí tjín kjoa xi 'nè nga kò nga'nó xi tjín-la Jesucristo mé-ne jè Nainá jeya kíjna-ne kò 'nga kíjna.

**Kó komà nga isa kjìn xita kòkjeiín-la 'én
ndaà-la Nainá xi kjoa ts'e Cristo**

¹²Ndí 'ndsè, mejèn-na nga ndaà kàtasijiin-nò nga k'oaá s'ín tímochjeén ngats'iì kjoa xi tímat'ian nga isa kjìn xita mokjeiín-la 'én ndaà-la Nainá xi kjoa ts'e Cristo. ¹³Nga ngats'iì soldado xi síkinda ni'ya osen kò ngats'iì xita xi i'nga, tíjjiin-la nga koií kjoa-la 'én-la Cristo nga ndayá tijnāa. ¹⁴Jñà xita xinguiāá xi 'ndsé chibá, nga nchibeè nga ndayá tijnāa'ya, kjìn ma-ne xi ma'nó ikon, mì tì kiì tsakjón-ne it'aà ts'e 'én ndaà-la Nainá xi kjoa ts'e Cristo nga chjayajiin-la xita.

¹⁵Kixíí kjoa, tjín i'nga xita xi 'én-la Cristo chjaya ta koií kjoa-la nga machinikeè-na nga jè xi mejèn-la nga isa kjìn xita kjit'aà-la. Tanga tìkoaá tjín i'nga xi ndaà tjín inima-la nga bénojmi kixi jè 'én-la Cristo. ¹⁶Jñà xita xi ndaà tjín inima-la, k'oaá s'ín bénojmi nga matsjakeè-na, nga jyeé ndaà tíjjiin-la nga Nainá íí kisikíjna-na ndayá mé-ne nga 'an kichjätjia 'én ndaà-la Nainá xi kjoa ts'e Cristo. ¹⁷Tanga jñà xita xi i'nga, nga chjaya it'aà ts'e Cristo, mìtsà kò inima-la bénojmi. Ta jè xi mejèn-la nga kjìn xita kjit'aà-la. K'oaá s'ín mejèn-la nga isa tse kjo'in síkjiaán nga jye ndayá tijnāa'ya. ¹⁸Mìtsà mé-ne, tsà ndaá tjín inima-la nga okóya 'én ndaà-la Nainá, kò tsà majìn; mì 'aán oko-na. Ta jè xi mejèn-na nga kàtachjaya 'én ndaà-la Nainá xi kjoa ts'e Cristo. K'oaá ma-ne nga tsja ma-na.

Mé xi 'nó mejèn-la Pablo

Nga tífi nachrjein kòtsjaá-isa-na, ¹⁹koií kjoa-la nga ngats'iì kjoa xi tíma, jyeé tíjjiin-na nga kijchò nachrjein nga kítkòkàjñāa kjo'in koi-né nga jñò bitsi'batji-ná kò nga tsjá-ná nga'nó Inima

Tsjeè-là Cristo. ²⁰Ta jè xi 'ñó mejèn-na kò tìkoña kjoa nga mì kosobà-na nga ch'o síkíjna Cristo. Jè xi mejèn-na nga mì kì tsakjoòn-là xitá nga ma kichjà-là mé-ne 'an, tsà tijnakoan, kò nas'ín kiyá, jè Cristo jeya kíjna it'aà ts'an. ²¹'An, nga tijnakoan, jè-né nga jeya kíjna Cristo. Kò tsà 'an kiyá, isaá-la ndaà s'e. ²²Tanga tsà takó kótijnakoan i isò'nde, tsà koií nachrjein-la s'iin-isa xá-là Nainá. K'oaá ma-ne, mìkiì be mé xi isa ndaà tjin. ²³Ingajò kjoa koi 'ñó 'in ma-na; jòya tjin kjohítsjeèn-na; mejèn-na nga kàtiyaà mé-ne nga ya kótijnakoaa Cristo; nga isaá-la 'ñó ndaà s'e. ²⁴Tanga xi kjondaà tsajòn, isa 'ñó mochjeén nga kótijnakon isa. ²⁵K'oaá s'ín beè-là takoàn nga kótijnakon isa, nga k'oaá s'ín tijnogò takoàn nga mochjeén-nò it'aà ts'an. Kótijnajiin-nò mé-ne koma siichját'aà-nò nga isa tsja koma-nò koni s'ín mokjeiín-nò kò nga isa ndaà kòkjeiín-isa-nò. ²⁶Mé-ne k'e nga kijchokon ijnogò k'a-nò, isaá tsja koma-nò nga isa 'nga síkíjna Cristo Jesús koni s'ín osiko-na.

²⁷Ta jè xi 'ñó mochjeén nga k'oas'ín tijnchá yijo-nò koni tsò 'én ndaà-là Nainá xi kjoa ts'e Cristo; mé-ne tsà koma kíkion-nò kò tsà mìkiì koma kjián, takó kji'nchrè-ná nga kixi títsajnakoo 'én, nga jngoo tjin kjohítsjeèn-nò nga ngàsòn títsabixkàn-tjiò koni s'ín mokjeiín-nò 'én ndaà-là Nainá xi kjoa ts'e Cristo, ²⁸nga mì tsakjoòn-là jña xitá kondra-nò. Koni s'ín títsa'nè ngats'iì kjoa koi, k'oaá s'ín sijna koni jngoo chibá xi okó nga jña xitá kondra, kjoehesòn-né, tanga jñò, kitjokàjiin-nò kjo'in. Kjoa koi, it'aà ts'e Nainá nchrobá-ne. ²⁹Nga Nainá tikoáá tsjá-nò kjondaà nga kjo'in títsanikjioón xi kjoa ts'e Cristo koni s'ín kitsjaà-nò kjondaà nga kòkjeiín-nò 'én ndaà-là. ³⁰Nga jña kjoa xi tjin-nò i'ndeì, tijnà-ne xi 'an kis'e-na koni s'ín ki'yaà jñò, kò takó koií kjoa tjin-na skanda nachrjein i'ndeì koni s'ín títsana'yà.

Kjohítsjeèn xi kis'e-là Cristo nga nangui kisikíjna yijo-là i isò'nde

2 ¹Jñò, nga Cristo tsjá-là nga'ñó inima-nò, kò nga jè kjoatjòcha síje takòn-nò, kò nga jè Inima Tsjeè-là Nainá ndaà síkítsajnajtín-nò nga nìxákjòd, kò nga nguì koó inima-nò tjin-nò kjohimatakòn, ²k'oaá ma-ne nga síjé-nò nga ta jngoo kjohítsjeèn kàtas'e-nò, jngoo kjoatjòcha, ngàsòn t'è-là takòn, kò ngàsòn chibà-nò mé xi nìkítsjeèn mé-ne nga isa ndaà

kotsja-na. ³Kì kjoa 'nga takòn onguíchjaà, kò kì 'nga nìkítsajna yijo-nò. Ta saá nangui tìkítsajna yijo-nò, k'oaá s'ín jchaxkón xita xi kj'eíí koni tsà jñà títsajna ítòn. ⁴Kì ta koi nìkájno xi kjondaà tsajòn. Tìk'oaá tìkájno-nò mé xi mochjeén-la xita xi kj'eíí.

⁵K'oaá tjin kjohítsjeèn xi kàtas'e-nò koni tjin kjohítsjeèn xi tjin-la Cristo Jesús. ⁶Nas'ín tijè sobà-ne Nainá, mìtsà kos'ín kisikítsjeèn nga kjo'ño mejèn-la nga kos'ín kájna koni s'ín tjna Nainá. ⁷Ta saá 'ñó nangui kisikájna yijo-la nga kos'ín tsibijna koni jngod xita chi'nda, koni xi taxki xita isò'nde. ⁸K'e nga jye taxki xita komà, kisikajeén-la inima-la nga ndaà kisikitasòn yije-la Nainá skanda kó nga k'en nga ya kinik'en-t'aà krò. ⁹K'oaá ma-ne, Nainá, k'e nga jye kisikjaáya-la, taxki 'ño 'nga kisikájna. Kítsjaà jngod-la 'ín xi isa 'ño 'nga tjna mé-ne jè kotixoma yije-la xita. ¹⁰Mé-ne nga it'aà ts'e Jesús kinchaxkó'nchi-la ngats'iì xi títsajna ngajmì, xi títsajna i it'aà nangui, kò xi títsajna jjiin nangui. ¹¹K'oaá s'ín kitsò ngats'iì xita nga Jesucristo, jè xi otixoma; k'oaá ma-ne nga jeya kájna Nainá xi Na'èn-ná.

Mé xi s'eén nga ixti tsjeè-la Nainá 'mì-ná

¹²K'oaá ma-ne, jñò ndí 'ndsè xi 'ño matsjake-nò, k'e nga tshóhótijnako-nò, kjit'aà nachrjein ndaà kinikitasòn. I'ndeí nga kjiin tijnáa, tákó k'oas'ín ndaà tikitason. K'oas'ín t'een nga kàta'ya-nò nga jyeé itjokàjñoò kjo'in kjoa ts'e jé-nò koií kjoa-la nga 'ño tsakjoòn-chaà yijo-nò. ¹³Nga jè Nainá xi ndaà tísíxájiin inima-nò. Jè síkítsjeèn-nò nga k'oaá s'ín mejèn-nò koni s'ín ndaà sasén-la Nainá kò tijè-ne xi tsjá-nò nga'ño nga ma k'oas'ín 'nè.

¹⁴Ndaà t'een yije nita mé kjoa-ne; kì taxki tsajét'aà-la Nainá kò kì chitiya-nò nita mé kjoa-ne. ¹⁵K'oaá s'ín koma-ne nga ixti tsjeè-la Nainá k'oín-nò; nímé jé s'e-nò nga titsajnajiin-là xita ts'en kò xi ch'o s'ín; jñò, k'oaá s'ín kàta'ya-nò koni ni'ín-la ni'ño xi síhiseèn nánnda jñò choòn. ¹⁶Tika'bísòn 'én ndaà xi síkíjnakon inima-ná, mé-ne jè nachrjein k'e nga kjoíí jngod k'a Cristo, ndaà kotsja-na nga mìtsà ta kjojtò koni s'ín kis'iaàn nga 'ño kisixájiin-nò nga tsakoòya-nò 'én ndaà-la Nainá xi kjoa ts'e Cristo. ¹⁷An, matsjaá-na kò síjngoàà kjotsja xi tjin-nò nas'ín kjo'in tìsikjaán koni jñò nga kjo'in titsanìkjoón nga

koif kjoa-la nga mokjein-nò it'aà ts'e Cristo. Kjo'in xi tjin-nò k'oaá ngaya-la koni jngoò kjotjò xi jñò 'bi-là Nainá, ko jè kjo'in xi 'an tjin-na tikoaá 'an tsjaà-la Nainá koni kjotjò tsajòn. ¹⁸ Jñò, k'oaá tis'in kàtatsja-nò mé-ne kojngoò-ne kjotsja xi tjin-ná.

It'aà ts'e Timoteo

¹⁹ K'oaá s'in tísíkítsjeèn, tsà Na'èn-ná Jesús mejèn-la nga sikasén niton-nò Timoteo, mé-ne 'an kotsja-na k'e nga kjoiko-na okixi it'aà tsajòn kós'in titsajnaà. ²⁰ Mi ti yá xita tjin isa-na xi k'oas'in ngàsòn síkájno it'aà tsajòn koni jè Timoteo. ²¹ Ngats'i xita xi k'jei, saà kjondaà ts'eé ótsji, mikii ótsji xi kjondaà ts'e Cristo. ²² Jñò, jyeé ndaà tjiin-nò, jè Timoteo xita kixi-né. Ndaà síchját'aà-na it'aà ts'e 'én ndaà-la Nainá xi kjoa ts'e Cristo, k'oaá ngaya-la koni tsà ki'ndí ts'an-ná. ²³ Tikoña kjoa-ná nga sikasén-nò Timoteo k'e nga skoeè kós'in sindaàjiiin kjoa-na. ²⁴ Tanga jè Na'èn-ná ma'nót'aà takoàn, nga tsjá'nde-na nga tikoa 'an koma kjikon niton-nò.

It'aà ts'e Epafrodito

²⁵ Tanga k'oaá s'in kisíkítsjeèn nga ítjòn siikasén ijngoò k'a-nò jè 'ndsè Epafrodito. Ndaà kisixáko-na. K'oaá s'in tsajmeiko-na koni jngoò soldado nga bixkàn-tji-jen 'én-la Nainá. Nainá kàtíhji-nò nga kinikasén-ná k'e nga 'ño tímochjeén-na. Ndaà kisichját'aà-na. ²⁶ I'nde, mejèn-la nga skoexkon-nò ngats'ioò, 'ño tísíkájno nga jñò jyeé kina'yà nga kjòxk'én-né. ²⁷ Kixi kjoa nga kjòxk'én-né, kjomeé k'en. Tanga Nainá kjòhimakeè; mìtsà ta jè xi kjòhimakeè, koó 'an, mé-ne nga mì isa tse kjoaba s'e-na. ²⁸ K'oaá ma-ne nga tísikasén niton-nò, mé-ne k'e nga jchaxkoòn ijngoò k'a, kotsja-nò it'aà ts'e, koa 'an, tjáxin chiba-na kjoaba. ²⁹ Chjoéttjò nga ko kjotsja-nò nga 'ndséé chibá it'aà ts'e Na'èn-ná. Chaxkón yije xi ngàsòn ok'in-la koni jè. ³⁰ Koif kjoa-la it'aà ts'e xá-la Cristo nga kjomeé k'en. Jè kjoa xi jñò mikii komà kinichját'aà-ná, jé Epafrodito, 'ño tsibínè-la yijo-la nga ndaà kisichját'aà-na nas'in kjomeé k'en.

Mé kjoa xi isa 'ño chji-la nga kixi kitsajnaá nguixkon Nainá

3 ¹ Ndí 'ndsè, k'oaá xan-nò, tsja t'è-là inima-nò nga Na'èn-ná Jesús titsajnakoo. 'An, mikii masii-na nga tikjii ijngoò k'a-nò

jñà kjoa xi jye kòkjìn k'a kjii-nò nga kjondaà tsajòn-nò. ²Tikindaà yijo-nò it'aà ts'e jñà xita xi kjo'nó mejèn-la nga otet'aà yijo-la xita nga bit'aà chiba-la kjoa ts'e circuncisión. Tikindaà xita koi nga nimé chjí-la. Tikindaà nga 'nó ch'o s'ín. ³Jñá-ná xi nguì kixi kjoa nga tjit'aà chiba-ná nga 'ya-la nga xita-la Nainá 'mì-ná. Jñá-ná xi ndaà yaxkoán Nainá nga jè Inima Tsjeè-la síchját'aà-ná. 'Nó ndaà matsja-ná nga jè ma'nót'aà takoán Cristo Jesús nga mìtsà jè kjoa ts'e yijo-ná ma'nót'aà takoán. ⁴'An, mìtsà kjoa ts'e yijo-na ma'nót'aà takoán nas'ín kjìn skoya kjondaà kisikitasoàn. Tsà tjin i'nga xita xi koi ma'nót'aà takòn kjondaà xi tjin-la, tanga 'an mì k'oaá s'ín tis'iaàn nas'ín tsato kjìn skoya kjondaà kisikitasoàn. ⁵K'e nga tjin-la jìin nachrjein nga kits'ian, kisit'aà chiba-na kjoa ts'e circuncisión. 'An, xita Israel-ná, tje-la Benjamín-ná. Xita Hebreo-ná, kò jñà xita jchínga-na nguì xita Hebreo-né. 'An, nguì xita fariseo-ná nga jñà kjotíxoma-la xita judío nguì ndaà kisikitasoàn. ⁶Nga 'nó fit'aà-la koni s'ín tjin kjotíxoma-la xita judío, 'an skanda kiitjngui kondraá-la xita naxandá-la Cristo. 'An, nguì kixí kisikitasoàn kjotíxoma-la xita judío, nijngodò xi mikiì ndaà kisikitasoàn. ⁷Nga sa ítjòn, 'an, k'oaá s'ín kisikítsjeèn nga 'nó tse chjí-la ngats'iì kjoa koi; tanga i'ndeì nga Cristo fit'aà-la nimé chjí-la kjoa koi. ⁸Xi nguì okixi, ngats'iì kjoa xi 'an ma'nót'aà takoàn nga sa kjotseé, i'ndeì, k'oaá s'ín beè takoàn nga nimé chjí-la mì k'oaà-ne koni s'ín bexkoan Cristo Jesús xi otíxoma-na nga isa 'nó tsato chjí-la. Ngats'iì kjoa koi, jyeé tsachrjengua yije xi kjoa-la Cristo. Ta tje beè takoàn mé-ne nga ya ma fit'aà-la Cristo ⁹kò mé-ne nga ya kótijnakjoðkoa. Nga kixi ótjina nga nguixkòn Nainá, mìtsà koi kjoa-la nga 'an ndaà sikitasoàn kjotíxoma-la xita judío, koi-né nga mokjeín-na it'aà ts'e Cristo. Jè Nainá xi kixi síkijna-na koií kjoa-la nga mokjeín-na. ¹⁰Mejèn-na nga isa ndaà skoexkoan Cristo; skoeè nga'nó xi tjin-la nga jaáya-la it'aà ts'e kjoabiyaà; kátamajngodò kjohítsjeèn-na kò ts'e Cristo koni s'ín komàt'in nga kisikjeín kjo'in skanda k'e nga k'en, ¹¹mé-ne k'oa tis'ín kjoáya-na it'aà ts'e kjoabiyaà koni s'ín jaáya-la Cristo.

Mé xi s'ín Pablo nga ma kijchò tjingui-la kjotjò xi tsjá Nainá

¹²Mìtsà tsò-ne kjoa nga jye kjòngàsòn yije-na kjoa koi. Kj'eè tsà nguì xita kixi 'mì-na. Tanga tífi tjingui-la nga mejèn-na nga isa ndaà skoexkoan skanda kó nga kijchò tjingui-la mé kjoa-ne nga ijchò tjingui-na Cristo Jesús. ¹³Ndí 'ndsè, k'oaá s'ín

machiya-na, kj'eè kii bijchó tjingui yije-la kjondaà xi tjin-la Cristo. Tanga jngod kjoa tìs'iaàn, tìsìjchàajnaà yije kjoa xi jye tsato, tìbìnè-la yijo-na nga kijchò tjingui-la kjoa xi sa nchrobá. ¹⁴Tífi tjingui-la skanda ñánda fehet'aà-ne, mé-ne nga tjoé-na kjotjò xi Nainá tsjá-na nga xó kiichja-na Nainá ján ngajmii nga Cristo Jesús tijnakoaa.

¹⁵Ngats'iaá xi jye ndaà mokjeín-ná it'aà ts'e Cristo, ngásòn ngáya k'oas'ín síkítsjeén. Jñò, tsà mìkii k'oas'ín nìkítsjeèn, Nainá sìkíchiyandaà-nò. ¹⁶Tanga mochjeén-né nga k'oas'ín síkitasoán koni kji jye machiya-ná skanda nachrjein i'ndeì.

¹⁷Ndí 'ndsè, k'oaá s'ín tijchá yijo-nò koni s'ín tìsìjchá yijo-na. Chjngui-là jñá xita xi k'oas'ín ndaà nchisìjchá yijo-la koni s'ín tìtsa'ne-jen. ¹⁸Nga kjìn ma xita xi tjíma xi kondra fì tjingui-la jè 'én xi tìs'enojmíya nga krò k'en-t'aà Cristo. Kòkjìn k'a k'oa xan-nò; i'ndeì skanda koó ndáxkoaàn tìbìxteèn nga ijngod k'a k'oa tìxan-nò. ¹⁹Xita koi, k'e nga kjoehet'aà nachrjein-la, kjo'ín sìkjeín nita kjé-ne. Ta koií ótsji kjoa xi síjé yijo-la kò mìtsà Nainá ótsji. 'Nga síkítsajna yijo-la kjoa xi tjinè-la nga kosobà-la. Tà koií síkítsjeèn kjoa ts'e isò'nde. ²⁰Tanga jñá, ján i'nde-ná ngajmii. 'Nó ndaà tìtsachiñá-lá nga ya kjinchrobà-ne jngod xi kochrjekàjìin-ná kjo'in, jè-né Jesucristo xi otíxoma-ná. ²¹Jè sìkijatjìya-la yijo ni'nde-ná; k'oaá kji koma koni kji ts'e jè, nga jeya kji. Jè sìkjeén nga'ño xi tjin-la nga jè otíxoma yije-la nita mé xi tjin.

Mé xi s'eén nga jye kixi tìtsajnaakoá Cristo

4 ¹K'oaá ma-ne jñò ndí 'ndsè xi 'ño matsjake-nò, kò nga 'ño makájno-na nga mejèn-na skoexkon-nò, kò nga nìtsja-là inìma-na, kò jñò xi kjotjò-na ma it'aà ts'e xá-na, k'oaá xan-nò nga kixi tìtsajnaako Na'èn-ná, jñò xi 'ño matsjake-nò.

²Tìbitsi'bà-la jè Evodia kò Síntique, nga ngásòn ndaà kàtjìko xíkjín nga ndichja joó xi it'aà ts'e Na'èn-ná. ³Tìk'oaá ngaji ndí 'ndsè xi ngásòn taña nìxá, tìsìjé't'aà-lè, tìchját'aà-la íchjín koi; nga ndaà kisixáko-na it'aà ts'e 'én ndaà-la Nainá xi kjoa ts'e Cristo. Kò jè Clemente kò xita xi i'nga tìk'oaá ndaà kisixáko-na. Xita koi, jye tjt'aà 'ín-la xojon ts'e kjoabinachon ján ngajmii.

⁴Tsja t'è-là inìma-nò nga Na'èn-ná tìtsajnaako. Ijngod k'a k'oa xan-nò: ¡Tsja t'è-là takòn! ⁵Jñò, kàtabeè yije-nò xita nga xita ndaà 'mì-nò. Jyeé tímachraña nga kjoifì ijngod k'a Na'èn-ná.

⁶Kì mé kjoa nìkájno. Ta ìsaá tjiét'aà-là Nainá k'è nga mé xi mochjeén-nò. Tikoá tjiì-là kjòndaà. ⁷K'oaá s'ín koma-ne nga tsjá-nò kjoa'nchán Nainá. Jè kjoa'nchán xi tsjá-nò fahatonè-là koni s'ín bítsjeèn-là xitá. Kjoa'nchán jè, jè xi sììkinda inìma-nò kò kjohítsjeèn-nò nga Cristo Jesús titsajnakoo.

⁸Ndí 'ndsè k'oaá xan-nò xi fehet'aà-ne. Tikítsjeèn xi kjoa kixì, kjoa xi ndaà yaxkón, kjoa xi ndaà tjin nga nguixkon Nainá, kjoa xi tsjeè tjin, kjoa xi ndaà sasén-ná, kò ngats'iì kjoa xi ndaà na'yà-là. Kò tsà tjin-isa kjoa xi kje'ei xi 'nó ndaà tjin, xi ok'in-là nga 'nga kítsajna, koií kjoa tikítsjeèn.

⁹K'oas'ín t'een koni s'ín tsakoðya-nò okixì xi 'an kitsjaà-nò, 'én xi kina'yá-ná, koni s'ín ki'ya-ná nga kis'iaàn; tákó k'oas'ín t'een. Nainá xi tsjaà-là kjoa 'nchán inìma-ná, jè kijnako-nò.

Kjondaà-là ts'è xitá Filipos it'aà ts'è Pablo

¹⁰'Nó matsja-na koni síko-na Na'èn-ná nga ijchò nachrjein, ìjngò k'a kinikítsjeèn-ná. 'An k'oaá s'ín síkítsjeèn nga mìtsà kinìchàajñò xi it'aà ts'an, tà jè-né nga mìkiì xátì kitjò'nde-nò nga kinìchját'aà-ná. ¹¹Mìtsà koi kjoa-là nga k'oatìxan-nò tsà mé tsojmì xi chijat'aà-na. Jyeé kjò'nga-na nga majngòè takoàn mé xi tjin-na. ¹²Be-ná kó ma nga ìma tísíjchá yijo-na. Tikoáá be-ná kó ma k'è nga tjin-na tsojmì. Jye tíbe nita mé kjoa xi tímat'ian. Tijé-na tsà skiì tìjna ìndsò'bà, kò tsà kjinchrá tìbiyaa, tsà ningui-na tsojmì kò tsà nímé tsojmì tjin-na. ¹³Koma yijeé-na nita mé kjoa-ne nga jè Cristo tsjá-na nga'nó. ¹⁴Tanga jñò, tákó ndaà ki'nè-nò nga kinìchját'aà-ná k'è nga kjoa tijnajñaà.

¹⁵Jñò xi naxandá Filipo tsajòn, tíjiin-nò nga ta jñò-nò xi kinìchját'aà-ná mé xi kjòchjeén-na, jè nachrjein k'è nga kiaà nangui Macedonia k'è nga sa tsibìts'iaa nga kichjàko-nò 'én ndaà-là Nainá xi kjoa ts'è Cristo. Nijngòè naxandá-là Cristo xi kje'ei xi ma-là kisìchját'aà-na. ¹⁶Tikoáá k'è nga tsohótijna naxandá Tesalónica, jngòè jò k'a kinikasén-ná kjotjò xi kjòchjeén-na. ¹⁷Mìtsà mé kjotjò tsajòn xi mejèn-isa-na, ta jè xi mejèn-na nga ìsa ndaà kàtasíchikon-t'in-nò Nainá. ¹⁸Jyeé kiskaat'aà yije-na ngats'iì xi kinikasén-ná. Jyeé tjin yije-na xi mochjeén-na skanda ninguií-na nga jyeé j'iiko-na nga'nó xi kinikasén-ná kò Epafrodito. Kjotjò xi kinikasén-ná k'oaá s'ín ngaya-là koni chrjongó-là Nainá xi 'nó ndaà jne, jña kjotjò

xi 'nó ndaà sasén-là Nainá. ¹⁹K'oaá ma-ne, jè Nainá xi 'an kjit'aàtakoàn, tsjá yije-nò nità mé xi chijat'aà-nò koni s'ín jeya tjín kjoa nchiná xi tjín-nò nga Cristo Jesús titsajnakoo. ²⁰Jè Nainá xi Na'èn-ná, jeya kàtìjna nità mé nachrjein-ne, nità mé nó-ne. K'oas'ín kàtama.

Xi fehet'aà-ne, Pablo síhixat'aà xità Filipos

²¹It'aà ts'an, tiixat'aà yije jñà xità naxandá-là Cristo xi ya títsajna. Jñà xità 'ndseé xi i títsajnakoo-na, tikoá nchisíhixat'aà-nò. ²²Ngats'iì xità-là Cristo síhixat'aà-nò. Jñà nchisíhixat'aà ítjòn-nò xi títsajna ni'ya-là César xi xitaxá ítjòn ts'e Roma.

²³Ngats'ioò, jè kàtìjnako-nò kjondaà-là Jesucristo xi otíxoma-ná. K'oas'ín kàtama.